

Fundà avant 40 onns

La Conferenza centrala roman-catolica svizra

■ (anr) **La Conferenza centrala roman-catolica en Svizra è vegnida fundada 1971 tras 18 chantuns. Sia finamira è da finanziar surchantunalmain pensums da la Baselgia. Oz èn tuts chantuns – cun excepziun da Sviz – commembers.** Questa fundaziun d'avant 40 onns considereschan ins oz sco in'ovra da pionier. Duairs da la Baselgia catolica sur ils confins chantunals e linguistics duaian vegnir finanziads da cuminanza. In onn suenter la fundaziun è vegnì arranschà la Sinoda 72 per realisar ils conclus dal Concil. La Conferenza centrala roman-catolica è sa cumprovada.

Grondas expensas – damain entradas

Ils pli blers meds finansials van per il secretariat da la Conferenza episcopala svizra e sias cumissiuns. Quel pensum da sustegnair vegn ademplì dapi 1983 da cuminanza cun l'Unfrenda da curaisma dals catolics svizzers.

Essend che las donaziuns a l'Unfrenda da curaisma èn idas enavos statan tras quella instituziun mintg'onn 8 pertschient (u 700 000 francs) pli pauc a disposiziun. Quai è ina consequenza ch'adina pli paucs van en baselgia ed unfreschan ed auters extreschan da quella.

Las plaivs e las Baselgias chantunals na demussian betg grond interess da confinanziar pensums naziunals. Ils meds finansials da la Baselgia catolica èn repartids fitg differentamain. 85 pertschient da quels restan en las plaivs, 13 pertschient tar las Baselgias

chantunals e mintgamai be 1 pertschient giaja a la diocesa ed a la Baselgia svizra.

La taglia da cultus vegn messa pli e pli en dumonda, oravant tut quella da personas giuridicas (interpresas). En divers chantuns, uschia er en il Grieschun, han ils giuvens liberals lantschà ina iniziativa per abolir la taglia da personas giuridicas.

Quai vess nauschas consequenzas. Prest 100 dals 400 milliuns taglia da cultus derivavan numnadamain 2009 en il chantun Turiatg da personas giuridicas.

Avischinaziun en l'uestgieu da Cuira

Las tensiuns e la polarisaziun senza senn tranter Baselgias chantunals da la diocesa e l'uestg *Vitus Huonder* vulan ins terminar. Latiers haja era la nominaziun d'in vicari episcopal per meglierar quellas relaziuns contribuì. Uschia vul il chantun Turiatg auzar las contribuziuns a l'uestgieu per mintga catolic da 2.20 sin 2.50 frs. La Baselgia catolica da Turiatg stat da preschent finanzialmain fitg bain.

Act festal

Per commemorar «40 onns Conferenza roman-catolica» arranscha quella ils 2 da december in act festal en l'Universitad da Turiatg cun 100 envidads. Tar quel discorra l'arzuvestg *Jean-Claude Pèrisset*, in Friburgais ch'è nunzi apostolic a Berlin, davart «Las Baselgias localas 'in communio' cun la Baselgia universala.»